

- रेल मंत्री अश्विनी वैष्णव कयो – ओडिशा मांय बालासोर रेल हादसा रे कारण अर इण रा जिम्मेदार लोगां रो ठा लाग गयो है।
- रेलवे रेल हादसा मांय मरण वाळा अर उठे फंस्या जातरूआं रे घर वाळां री सुविधा वास्ते हेल्पलाइन नम्बर 139 रो खास प्रबन्ध कियो है।
- विश्व पर्यावरण दिवस काल –राज्यपाल कलराज मिश्र माउंट आबू मांय पर्यावरण संरक्षण अर पौधारोपण सप्ताह री सरूआत करेला।
- प्रदेश मांय केई ठोड माथे आंधी अर बरसात सूं तापमान मांय कमी आई– काल घणकरी ठोड माथे बरसात री आस है।

0000

रेल मंत्री अश्विनी वैष्णव केंद्रीय मंत्री धर्मेंद्र प्रधान रे साथे बहनागा रेल हादसा री जगा रो दौरा कियो अर रेल यातायात ने बहाल करण वास्ते उठे चाल रिया मरम्मत कार्या रो जायजो लियो। रेल मंत्री कयो के रेल पटरी री मरम्मत रो काम चाले है अर इण मारग माथे रेलगाडियां री आवाजाही बुधवार ताई सरू होवण री आस है। रेल मंत्री आ भी कयो के हादसा रे असली कारण रो पता कर लियो गयो है।

श्री वैष्णव कयो के रेलवे सुरक्षा आयुक्त जद रेलगाडी रे पटरी सूं उतरण री उच्च स्तरीय जांच कर रया है अर बेगी इज सच्चाई सामे आ जावेला। इण बीच रेलवे तीन खास रेलगाडियां चलायी है। एक रेलगाडी भद्रक सूं चेन्नई अर दो रेलगाडियां हावड़ा सूं बालेश्वर रे बीच चालेला। इण बीच प्रधानमंत्री नरेन्द्र मोदी रेलमंत्री अश्विनी वैष्णव सूं बातचीत कर हादसा री जगा चाल रिया मरम्मत कामां री जाणकारी लीनी।

रेलवे ओडिशा मांय हुआ रेल हादसा मांय मरण वाळां अर उठे फंस्या जातरूआं रे घर वाळां री सुविधा रे वास्ते हेल्पलाइन नम्बर 139 रो खास प्रबंध कियो है। ठावा अफसरां रो दळ जोनल रेलवे अर राज्य सरकार रे तालमेल सूं इण हेल्पलाइन नम्बर माथे कॉल करण वाळां ने चौबीसां घंटा सगळी जाणकारी मिळेला। रेल मंत्रालय रे मुजब इण सेवा सूं रेल मंत्री अश्विनी वैष्णव रे मार्फत ऐलान हुई मदद राशि देवण री भी व्यवस्था होवेला।

रेल मंत्री मरण वाळां रे घर वाळां ने दस-दस लाख, गंभीर घायलां ने दो-दो लाख अर घायलां ने पचास-पचास हजार रुपयां री मदद दिया जावण रो ऐलान कीनो है। मंत्रालय रे मुजब हाल ताई 285 मामलां मांय तीन किरोड 22 लाख रुपया री मदद दी जा चुकी है। सात ठोड माथे सोरो, खडगपुर, बालासोर, खांतापाडा, भद्रक, कटक अर भुवनेश्वर मांय आ मदद दिया जावण री व्यवस्था की गी है।

ओडिशा रा मुख्यमंत्री नवीन पटनायक आज इण हादसा मांय मार्या ग्या हरेक आदमी रे घर वाळा ने पांच लाख रुपया री मदद देवण रो ऐलान कीनो है। इण रे अलावा, गंभीर रूप सूं घायल जातरूआं वास्ते एक लाख रुपया री मदद राशि रो भी ऐलान हुआ है। उठे केंद्रीय स्वास्थ्य मंत्री मनसुख मांडविया आज ओडिसा मांय इण हादसा मांय घायल जातरूआ ने दिया जा रया ईलाज रो जायजो लियो। स्वास्थ्य मंत्री बतायो के दिल्ली रा बड़ा सफाखाना सूं डॉक्टरां रो दळ मदद वास्ते उठे पूग चुकयो है।

000

रेलवे बोर्ड आज कहयो के बालासोर रेल हादसा री सरूआती जांच मांय सिग्नल मांय गडबडी सामे आई है। नुवी दिल्ली मांय खबरनवीसां सूं बातचीत मांय रेलवे बोर्ड संचालन अर व्यापार संवर्धन री सदस्य जया वर्मा सिन्हा बतायो के हादसा रे कारण रे बारा मांय रेलवे सुरक्षा आयुक्त री पूरी रपट री हाल उडीक है। वां बतायो के हादसा सिर्फ कोरोमंडल एक्सप्रेस रो इज हुआ है। हादसा रे बखत इण रेलगाडी री गति लगे-टगे 128 किलोमीटर प्रतिघंटा ही। सिन्हा कयो के मालगाडी पटरी सूं नी उतरी ही अर उण माथे कच्चो लोहो भरयोडो हो अर कोरोमंडल एक्सप्रेस माथे सब सूं ज्यादा असर पड्यो अर हादसा मांय घणी संख्या मांय लोगां रे मार्या जावण अर घायल होवण रो आ भी एक कारण हो। कोरोमंडल एक्सप्रेस री पटरी सूं उतरी बोगियां डाउन लाइण माथे आ गी अर यशवंतपुर एक्सप्रेस री आखिरी दो बोगियां सूं टकरा गी। उण बखत यशवंतपुर एक्सप्रेस 126 किलोमीटर प्रतिघंटा री रफतार सूं चाल री ही।

000

मुख्यमंत्री अशोक गहलोत कयो के राज्य रो नाम पूरा देश मांय मॉडल स्टेट रे रूप मांय उभर रह्यो है। श्री गहलोत आज जोधपुर मांय घोडाघाटी सूं मेहरानगढ किला ताई दस किरोड नब्बे लाख रूपया री लागत सूं बण्या राव जोधा मार्ग रे लोकार्पण जळसा मांय बोल रह्या हा। वां कयो के 565 साल पेला बस्योडा जोधपुर मांय तेजी सूं विकास हुआ हो। वां कयो के अठे आईआईटी जेडा विश्वस्तरीय शिक्षण संस्थानां रो होवणो बडी बात है। जोधपुर मांय मारवाड मेडिकल यूनिवर्सिटी खोलण रो ऐलान कियो गयो जिको राज्य री दूजी मेडिकल यूनिवर्सिटी होवेला। वां कयो के दिव्यांगजनां वास्ते महात्मा गांधी रे नाम माथे विश्वविद्यालय खोल्यो जावेला।

श्री गहलोत कयो के 600 किरोड रूपया री लागत सूं फिनटेक यूनिवर्सिटी रो भी काम सरू व्हे चुक्यो है। मुख्यमंत्री कयो के पर्यटन री निजर सूं जोधपुर महताउ जगह है, एडे मांय यूनेस्को ने इण शहर ने हैरिटेज सिटी ऐलान करणो चाहिजे। श्री गहलोत जोधपुर मांय 44 शिलान्यास अर 16 लोकार्पण कार्यक्रम मांय ऑन लाइन भाग लीनो। इण सूं पेला आज मुख्यमंत्री पाली मांय नगर विकास न्यास री कानी सूं बनाया गया तिरंगा स्थल माथे 100 फीट ऊंचा राष्ट्रीय ध्वज रो लोकार्पण कीनो। इण मौके माथे मुख्यमंत्री तिरंगा सर्किल रो भी लोकार्पण कीनो।

000

काल विश्व पर्यावरण दिवस है। पर्यावरण संरक्षण ने ले र जागरूकता सारू आखे प्रदेश मांय केई कार्यक्रम हो रया है। इण कड़ी मांय आज सवाईमाधोपुर मांय रणथंभौर बाघ परियोजना इलाका मांय स्वच्छता अभियान चलायो गयो। इण रे तैत वन महकमा री कानी सूं परियोजना रे सीता माता वन क्षेत्र परिसर मांय श्रमदान कर प्लास्टिक कचरो हटायो गयो। इण मौके माथे वन महकमा रा अफसरां सफाई रो संदेशों दीनो। भीलवाडा रा रीको डंपिंग यार्ड मांय आज विश्व पर्यावरण दिवस रे सिलसिले मांय पौधा लगाया गया। बूंदी मांय राजस्थान राज्य प्रदूषण नियंत्रण मंडल री कानी सूं अभिरुचि अर कौशल विकास शिविर मांय न्यारी-न्यारी प्रतियोगितावां हुई अर कलाकारां पर्यावरण बचावण रो संदेशो देवण वाळे नुक्कड नाटक ने भी पेश कियो। विश्व पर्यावरण दिवस रे मौके काल माउंटआबू मांय राज्यपाल कलराज मिश्र पर्यावरण संरक्षण अर पौधारोपण सप्ताह री सरूआत करेला। इण मौके माथे राज्यपाल प्लास्टिक रे इस्तेमाल ने घटावण ज्यादा सूं ज्यादा दरखत लगावण समेत पर्यावरण रे मुजब दिनचर्या अपणावण माथे जोर दीनो। श्री मिश्र जलवायु बदलाव रे कारण मौसम चक्र माथे पड़ रया खराब असर अर प्रदूषण ने कम करण वास्ते जागरूकता लावण ने महताऊ बतायो है। वां सगळा सूं वन, वन रा जीवां अर पर्यावरण री रखवाळी रो संकल्प लेवण रो कयो।

000

डूंगरपुर जिला री एक सरकारी स्कूल मांय नाबालिग बच्चियां रे साथे छेडछाड अर खोटा काम करण रे मामला मांय आरोपी हैडमास्टर ने गिरफ्तार कर लियो गयो है। पुलिस गांव वाळां री शिकायत रे पछे मामलो दर्ज कर आरोपी ने गिरफ्तार कर लियो अर इण मामला मांय शिक्षा महकमा हैडमास्टर ने निलंबित कर दियो है। जिला पुलिस अधीक्षक बतायो के मामला री जांच की जा री है। इण मामला ने ले र केंद्रीय जलशक्ति मंत्री गजेंद्र सिंह शेखावत ट्वीट कर करड़ी प्रतिक्रिया जाहिर कीनी है।

000

झालावाड जिला मांय इण बार लसण उपजावण वाळा काश्तकारां रा चेहरा खिल्योडा है। बढिया उपज सूं काश्तकारां ने लसण री खेती ने ले र रूझान तेजी सूं बढ़यो है। इण बार लसण रा बढिया भाव मिलण सूं काश्तकार राजी है। उलेख जोग है के लसण री बढ़ती पैदावार अर बढ़ता रकबा ने देखता थकां राज्य सरकार खानपुर मांय अस्थाई लसण मंडी बनायी है। इण सूं पेला काश्तकारां ने पडोसी राज्य मध्यप्रदेश रे नीमच मांय लसण बेचण जावणो पड़तो हो।

000

झालावाड मेडिकल कॉलेज मांय अबे बेगी इज टीबी री दवा री सेंसिटिविटी टेस्ट लैब खोली जावेला। इण वास्ते बेंगलुरु रा राष्ट्रीय तपेदिक संस्थान मंजूरी दे दीनी है। आ प्रदेश री पांचवीं लैब होवेला। इण सूं पेला जयपुर, जोधपुर, अजमेर अर बीकानेर मांय इण तरह री सुविधा ही।

000

आकाशवाणी समाचार जयपुर री कानी सूं श्रोतावां मांय मोटा अनाज ने लेर जागरूकता सारू संदेश श्रृंखला चलाई जा री है। इण मांय श्रोता संदेशो भेज र बता सके है के वे आपरा भोजन मांय मोटा अनाज ने किण तरह काम मांय लेवे है। श्रोता आपरा संदेशा लिख र या पछे रिकॉर्ड कर व्हाट्सएप नम्बर 94140-52368 माथे भेज सके है।

000

प्रदेश मांय केई ठोड माथे आंधी अर बरसात रो दौर चालू रेवण सू घणकरी ठोड माथे तापमान मांय कमी आई है। करौली अर उण रा कने रा इलाका मांय आज दुपहरी पछे हल्की बरसात हुई। राजधानी जयपुर मांय भी आज सुंवार बादळ मंड्या रया। मौसम महकमा आज जयपुर, भरतपुर, जोधपुर अर बीकानेर संभागां मांय कुछेक ठोड माथे बरसात होवण री आस जतायी है। अजमेर जिला रा विजयनगर इलाका मांय काल देर रात आंधी चालण सू एक मकान री भींत गिर गी। इण हादसा मांय एक ही परिवार रा तीन जणा री मौत व्हे ग्यी। मौसम महकमा काल जयपुर, भरतपुर, कोटा अर अजमेर संभागां मांय कठे-कठे हल्की सू मध्यम बरसात होवण रो अंदाजो लगायो है। उठे जोधपुर अर बीकानेर संभागां मांय भी हल्की बरसात री आस है।

000

जोधपुर मांय आज देवस्थान महकमा री कानी सू देवदर्शन पदयात्रा निकाली गी। पदयात्रा शहर री जूनी मंडी रा गंग श्यामजी मिन्दर सू पूजा-अर्चना रे पछे सरू हुई। पदयात्रा मांय श्रद्धालु भजन कीर्तन गावता थकां चाल्या। इण मौके माथे देवस्थान मंत्री शकुंतला रावत गायत्री यज्ञ मांय आहुतियां दीनी। श्रीमती रावत बतायो के इण पदयात्रा रो मकसद आपां रा जूना मिन्दरां रे बारे मांय जाणणो अर लोगां ने इण रे ऐतिहासिक महत्व रे बारे मांय बताणो है। वां कयो के इण सू पेलां जयपुर अर उदयपुर मांय भी ऐडी पद यात्रावां निकाली जा चुकी है।

000

राजधानी जयपुर समेत केई शहरां अर गांवां रे पीवण रे जळ री जरूरत ने पूरो करण वास्ते बीसलपुर बांध रे जल संग्रहण री खिमता बढाई जावेला। इण सू बीसलपुर बांध मांय आधा मीटर पाणी और बत्तो भेळो हो सकेला। इण योजना ने ले र सर्वे रो काम पूरो व्हे ग्यो है। राज्य सरकार री मंजूरी रे पछे खिमता बढावण रो काम सरू व्हे सकेला। बीसलपुर बांध री हाल पूरी भराव खिमता 315 दशमलव 50 आरएल मीटर है जिको बढण रे पछे 316 आरएल मीटर व्हे जावेला।

000